

Quiten. nullitatis cassationis Capituli.

Em.^{me} & Reu.^{me} Dñe. A Nno 1681. mense
Iulij fuit celebratum
Capitulum Prouinciale Fr.Eremit.Ord.S.Augustini Prouinciæ
Quitensis in Indijs Occidentalibus, in quo seruata forma à
S. Concilio Tridentino, & à Constitutionibus Ordinis requi-
sita per vota secreta primo loco suffragantibus quadraginta
Vocalibus, qui vocem habebant in dicto Capitulo nemine
excepto, in Priorem Prouincialem eiusdem Prouinciæ fuit
reelectus, seu confirmatus Admodum Reuerendus Pater Ma-
gister Petrus Pacheco Prouincialis immediatè absolutus, qui
licet contra relectionem huiusmodi tanquam ab ipsis Consti-
tutionibus, & litteris Apostolicis prohibitam palàm, & publicè
alta voce, & solemniter semel, & iterum protestatus fuerit de
nullitate, & insteterit ad nouum actum electionis procedi re-
nunciando, quatenus opus esset cuicumque iuri sibi quæsito,
eamdemque protestationem renouauerit Regius Senator, qui
pro pace tuenda assistebat comitijs. Nihilominus Pater Præ-
sidentis asserendo, quod opus non erat ad nouam electionem
deuenire, dum reelectio prædicta completa erat de vnanimi
totius Prouinciæ consensu Patri Pacheco, vt supra electo
adhuc rennenti, & iterum protestanti virtute sanctæ obedi-
entiæ imperauit, vt acceptaret officium, & subito omnes Voca-
les à loco surgentes, nulloque modo volentes ad aliam ele-
ctionem procedere, cantantesque Te Deum laudamus, exie-
runt à Capitulo, & processionaliter electum duxerunt ad ma-
ximam Cappellam Ecclesiæ, vbi omnes obedientiam ei præsti-
terunt, & à Patre Præsidente in officio fuit confirmatus, mox-
que eadem die post vespèras Vocales denuò congregati ad
electiones Definitorum omnibus etiam suffragijs Canonice
processerunt, qui successiue, vt moris est, instituerunt in De-
finitorio Priores Conuentuum, multaque decreta ediderunt
pro felici Prouinciæ regimine, vt constat ex publicis actis,
quæ dantur integra.

Sed quando per hæc ita concorditer stabilita sperabat Prouincia
iustitiam, & pacem mutuò sese esse amplexas, & solidæ eius
vnita-

vnitati, ac quieti consultum fuisse ob idque Procuratorem suum ad Urbem destinauisset, qui memoratæ Prioris Prouincialis relectionis, cæterorumque actuum Capituli confirmationem à Sedis Apostolicæ benignitate impetraret. Accidit, quod Reu. Pater Magister Ioseph Zuleta Reales Procurator specialis ad hæc constitutus aduersa navigatione detentus nonnisi post multum temporis cursum ad Oras Hispaniæ potuit appellere, & statim ibi grauissimo morbo correptus cum vitæ discrimine diu ægrotauit.

Quo medio tempore Reuerendissimus Pater Ordinis Generalis aliunde de supradictis electionibus Capitularibus certior factus, quantumuis sciret Procuratorem Prouinciæ, ut dictum est Matriti infirmitate teneri, nihilominus non expectato eo, nec audito, minusque vocato, aut aliter citatis electis pro suis defensionibus ex solo motiuo, quod Ordinis Constitutiones à Summis Pontificibus confirmatæ, reelectiones Priorum Prouincialium prohibeant, nedum hanc nostram Patris Pacheco cassauit, & irritam fecit, sed falsò credens eius vitium ad nullitatem omnium aliarum electionum, & actorum totius Capituli etiam influere hæc omnia, & singula quoque abrogauit, & præterea nouum Priorem, seu Rectorem Prouincialem, nouosque Definidores à quibus pendet institutio Priorum Conuentuum, & consequenter Regimen totius Prouinciæ iure quasi deuoluto ex integro per se ipsum instituit, & litteras prouisionales transmisit cum quibus ab eo nominati, & instituti dubium haud est, quod in suorum officiorum possessionem cum graui scandalo, & maxima Prouinciæ perturbatione sint hodie intrusi.

Quapropter cum in his omnibus Pater Reuerendissimus Ordinis excessisse credatur vsum legitimum suæ potestatis cum iniuria, & summo Prouinciæ, electorumque grauamine, & eis interfit in sua libertate, & iure quæsito restitui, ne præferim similia in extensionem illicitam autoritatis Patris Generalis pessimo exemplo trahantur, idcirco Procurator Prouinciæ antedictus à die habitæ notitiæ appellando recursum habet ad Sanctam Sedem Apostolicam, & hanc Sac. Congregationem petendo humiliter, ut præuia manutentione electorum in officijs Prouincialatus, Definitoratuum, & Prioratuum, in quibus singuli respectiue in dicto Capitulo Prouinciali confirmati, electi, & instituti fuerunt dignentur Eminentiæ VV. pro

pro iustitia respondere, electiones in dicto Capitulo fuisse, & esse canonicas, & cassationes earum, nouasque prouisiones, & institutiones Reuerendissimi Patris Generalis cum inde secutis non sustineri.

Quippe cum ritè, & rectè Capitulum supradictum conuocatum extiterit, & per vota secreta seruata forma à Sacro Concilio Tridentino, & à Constitutionibus Ordinis requisita, electiones in eo celebratæ, & successiue electi per Præsidentem in suis officijs confirmati, eorumque possessionem adepti fuerint, ut pater ex actis, non poterat Pater Reuerendissimus Generalis has electiones cassando electos iure quæsito, & possessione adepta priuare sine ordine, & tela iudicij, citando Procuratorem ab eis constitutum, & illum audiendo in suis defensionibus, quod cum ab eodem Patre Generali adimplerum non fuerit ex illius facto nullo, spoliatiuo, & iniusto non remanserunt electi priuari sua possessione, debentque ante omnem discussionem auctoritate Iudicis superioris in illa manuteneri, ut punctualiter pleno calamo docent, *Monald. conf. 104. n. 22. & seqq. lib. 2. Valenz. conf. 44. à num. 1. usque ad 10. lib. 1. Barbof. voto decis. 97. num. 2. & infra, & num. 77. & seqq. lib. 3.* qui loquitur in specie de electione Prouincialis Prouinciæ Bethicæ cassata à Patre Generali nostri Ordinis Sancti Augustini, *Lezana post summam verb. relectio num. 23. & seqq. Rota decis. 6. & decis. 13. per totas coram Royas.*

In nihilo refragante, quod Pater Reuerendissimus Generalis processerit ad cassationem Capituli extraiudicialiter negando confirmationem, non in forma iudicij, quo casu non tenebatur citare electos, & Iudicis partes assumere. Quoniam id non procedit, primò in Generali Ordinis S. Augustini, qui ex Constitutione prima Iulij Tertij in Bullario Ordinis, *Summ. num. 1.* est obligatus causam denegationis exprimere, nam ita tenetur per viam iudicij procedere, ut punctualiter aduertit, *Barbof. in dicto voto 97. num. 81.* Secundò, quia cassatio electionis Prioris Prouincialis totius Capituli facta non fuit ex aliquo defectu formæ in electione à iure, & à Constitutionibus requisita, sed propter incapacitatem, & vitium dumtaxat Personæ Prouincialis reeligi prohibita, quo casu semper est procedendum cum ordine, & tela iudicij, debetque electus audiri, & citari ob graue præiudicium, quod illi inferitur, ut probat Frater Petrus Maria, *Passerin. de electione canonica cap. 33. num. 152. & sequen.* Cuius testimonio nedum ob pietatis

tatis, & doctri næ excellentiam, sed multo magis, quia in hac materia ratione sui officij fuit versatissimus, multum est defendendum, nosque idè solam illius autoritatem vt plurimum contenti erimus infra allegare. Et tertio denique, quia contraria procedunt in denegatione confirmationis re integræ priusquam electi in suis officijs sint confirmati, & possessionem eorum apprehenderint, nam post confirmationem, & possessionem quales sunt, termini casus nostri superiori non licet ad cassationem, & iritationem electionum procedere eis non citatis, vt præ ceteris distinguit, *Capon. discept. 261. nu. 33. cum seqq. & rursus num. 81. & infra.*

Etiamsi opponeretur vitium esse notorium, & ex actis ipsis insurgere, & propterea cum electo nulla defensio competeret, potuerit eius electio cassari sine aliqua citatione, maxime quia si citari debuisset impossibile moraliter esset negocium expedire confirmationis, seu infirmationis, cum antequam ex Indijs ad Urbem citatio executæ reproducatur, tempus decurreret, & præteriret officij Prouincialatus, & per consequens cassatio electionis ad nihil postea inferuiret, vt in proposito argumentatur, *Passerin. d. cap. 33. sub num. 151. versic. Præterea secundo probatur.*

Quandoquidem licet electio Prioris Prouincialis negari non possit, quod facta fuerit contra expressum tenorem Constitutionum, non tamen sequitur, quod nulla extiterit ipso iure, & quod iura, & rationes electo non suppetant ad petendam eiusdem confirmationem, vt infra apparebit: ac rursus quando etiam fuisset inualida electio Prioris Prouincialis, eique nullæ competere defensiones ad sustinendam suam electionem, non sequitur tamen, quod nullæ etiam fuerint cæteræ omnes electiones Definitorum, & Priorum Conuentuum in eodem Capitulo celebratæ, vt infra ostendemus. Quapropter cum ex vnico, & solo vitio reelectionis Prouincialis Pater Reuerendissimus Ordinis non solum cassauerit ipsius electionem, sed etiam alias omnes, in quibus iste defectus non concurrebat, vti ex peccato originali traduces, utique processus hic repugnans est omni iuri communi scilicet naturali, & diuino, quæ abhorrent aliquem condemnari inauditum etiamsi procedendo cum ordine iuris inutile postea redderetur iudicium, quia tempus decurreret officio præfixum, & electus interim eo gauderet in iuris contemptum, quia si peccandum est

est, melius est peccare tolerando non benè electum, & in officio intrusum in sua quasi possessione manere, quam electionem cassando à iure suo non discussio negotio, & sine citatione eum de facto spoliare, vt punctualiter ad obiectum respondit, *Passerin. eodè cap. 33. sub num. 164.*

Præterquamquod in casu nostro cessat omnis dubietas, quia citatio non erat in Indijs exequenda, sed in Hispania, vbi Prouinciæ Procurator stabat infirmus, & breui duorum tantum mensium curriculo haberi poterat, nam sanè quando etiam aliter iustitiæ rigor dictasset, durissimum est audire, quod Pater Generalis voluerit cum tanta iniuria Prouinciæ integrum extra iudicium cassare Capitulum priuatis informationibus non expectato per tam breue tempus, nec audito Procuratore, qui per tot marium spatia, longaque itinera maximo suæ vitæ periculo Europam tenuit hoc solo fine vt ipsum Patrem Generalem de causis validitatis, & confirmationis eiusdem Capituli instructum redderet nam æquitas, & iustitia in his terminis suggerebant, vt Procurator infirmus, qui accedere ad Urbem nequibat, & non dolo, nec fraude, sed pura necessitate iudicium differre erat coactus expectari, & audiri debuisset, nedum pro gravitate negotij, & in honorem Prouinciæ à quo missus erat, sed etiam in sui laboris solatium & leuamentum. Factumque ostendit, quod si Reuerendissimus Pater tantisper, vt tenebatur iudicium sustinuisset, & præcipitem sollicitatus non tulisset sententiam vtique ex asserendis per iustitiam quam cordi eius affixam semper esse cognouimus non sic pronunciaisset.

Enim verò vitium vnicum per quod Capitulum fuit ab ipso cassatum, scilicet reelectio immediata Prioris Prouincialis contra expressam prohibitionem Constitutionis *par. 3. capit. 2. §. 8.* de qua in *Summario numer. 2.* non erat, nec est tantæ virtutis, vt impedire potuerit confirmationem electionis, quando hæc etiam fuisset inualida, multoque minus suam efficaciam extendere ad annullandas etiam cæteras electiones canonicas vitio huiusmodi non subiectas, & operandum quod ius instituendi Prælatos esset ad Patrem Reuerendissimum Ordinis deuolutum.

Quoniam Constitutio licet in ordine reelectiones, & confirma-

firmationes prohibeat, vt supra dictum est. Idemque mandant litteræ Martini V. Constitutione 2. & Nicolai etiam V. pariter Constitutione 2. in Bullario ipsius Ordinis *Summar. num. 3.* Attamen hæc prohibitio, quia simplex est sine Decreto irritante, vt lectura demonstrat non operatur, vt actus nullus sit ipso Iure si fieri quandoque contingat aduersus legis eiusdem prohibitionem cum ad effectum irritationis satis non sit; quod lex reelectionem simpliciter interdicit, nisi coniunctim expressè eam nullam esse decernat, atque declaret, vt per sententiam communem fusè probat *Passerin. de elect. cap. 9. num. 1. & sequen. toto quesito primo*. Indèque vbi ipsa lex voluit, quod in officio Generalatus reelectio inualida existeret, non fuit contenta simpliciter eam prohibere sub dura etiam poena excommunicationis, sed prohibitioni coniunctum est Decretum irritans expressè mandando aliter factas electiones, & confirmationes nullas, & irritas esse, & fore vt constat ex *Constitutione 2. Sixti V. §. 4. in dicto Bullario Summario num. 4.*

Quapropter cum ad terminos Constitutionum reelectio Prouincialis in nostro Capitulo nulla non fuerit ipso Iure, & causæ impulsuæ concurrant pro necessaria canonica eiusdem confirmatione Pater Reuerendissimus Ordinis licet per se reelectio inualida esset, non debuit ex hoc solo defectu ad illius cassationem procedere, quia cum talis defectus non sit criminofus, nec formam electionis substantialem respiciat, sed à legali dumtaxat impedimento per strictam Iuris censuram descendat, erat sua natura sanabilis per recursum ad hanc S. Congregationem, quæ similes rigorosas nullitates non solet attendere, sed semper ex stylo benignè reualidat, vt pluries insinuat *bo. me. Card. de Luca de regular. disc. 1. num. 94. & 95. disc. 3. num. 5. disc. 11. num. 12. & disc. 53. n. 4. & in individualibus terminis reelectionis prohibita in annotat. ad S. Conc. Trid. disc. 37. num. 19.*

Præsertim attentis circumstantijs facti, quæ reualidationem huiusmodi omninò exposcunt, quandoquidem aduertendum est primo loco; quod dicta reelectio fuit celebrata ab omnibus Electoribus nemine reluctante per vota secreta, vt ex actis littera I. & rursus in fine eorum litt. CC. & sic per quasi inspirationem de totius Prouinciæ consensu. Vnde quicquid esset

esset dicendum si aliquis electorum contradixisset, in quibus terminis locum haberet Constitutio, licet reelectio maiori parte votorum esset peracta; vtiq; dum è contra omnibus votis celebrata comperitur à dicta Constitutione exceptuata, intelligitur, quia cum Constitutio recipiat intelligentiam passiuam à Iure communi, & in Iure iste casus sit specialiter Priuilegiatus. Sequitur in consequentiam, quod sub expressa iuris ipsius limitatione remaneat, & sub regula generaliter prohibitiua Constitutionis venire non possit, vt ad litteram decidit *Textus in §. final. vers. Si vero auth. de Defensor. Ciuit. sequenti Sanctione*, ilbi: *Si verò nondum biennium impleuerint digni, vero videantur communicare circulo impleant reliquum tempus, ultra quod nullus Ciuitatem defendat: sed vsque ad hoc solum stet tempus, nisi cum Ciuitas reluctante nullo elegerit eum, & hoc facto alio biennio suscipiat sollicitudinem, & modis omnibus deponatur, & tunc rursus fiat quando ipse eum circulus ad huc adduxerit ordinem, ne frequentia ordinationis, & continuatione cura, & per quandam machinationem illud semper renouando fiat aliquibus infinita prædicta gubernatio, & in terminis præcisis relectionis prohibita inter regulares, quod teneat si fiat omnium electorum suffragijs fundat Sigismun. à Bononia de elect. par. 3. dub. 103. & sequuntur Lauor. var. Lucubrat. tom. 1. lib. 4. de elect. Canonica cap. 23. num. 8. Passerin. de elect. cap. 35. num. 22.*

Secundo loco est etiam ponderandum, quod finis legis in prohibendo istas relectiones alius non est, nisi excludendi ambitionem vt specialiter declarat *Constitutio 2. Martini V. in Bullario ordinis §. 2. Summ. num. 3. litt. A.* & propterea quando reelectio fit non ex electi ambitione, sed promouetur ab electoribus pro bono Prouinciæ regimine cessante fine legis per quem fuit actus prohibitus, debet cessare etiam legis ipsius dispositio ex vulgatis.

Quod autem nostræ relectioni causam non dederit electi ambitus ostendunt acta Capituli, dum ex eis constat, quod publicata relectione, electus contra eam publicè, & alta voce de nullitate potestatus fuit *lit. K.* instetit, quod ad nouam electionem canonicam procederetur *lit. L.* renunciando propterea cuicumque Iuri ipsi quæsito *lit. M.* & ad declarationem Præsidentis dicentis non esse deueniendum ad aliam electionem stante quod reelectio omnium suffragijs completa ma-

ta maneret *litt. O.* non acquieuit, sed iterum contradixit *litt. P.* donec per posituum præceptum in virtute sanctæ obedi-
tiæ *litt. Q.* conspirantibus etiam in id omnibus Electoribus,
qui surgendo à sedibus suis declarauerunt non velle ad aliam
electionem deuenire *litt. R.* compulsus fuit ad acceptandum
officium. Nam hæc omnia, & singula, quæ formale electi-
disensum important ostendunt etiam parenter, quod reele-
ctio per ambitionem procurata non fuerit, sed imò per quasi
inspirationem peracta extiterit, qui modus eligendi subiectus
non est regulis, & ordinationibus, cum omnis ordo, & eligen-
di forma à Spiritu Sancto, qui ad huiusmodi electionem mo-
uet suppleatur, vt habetur ex *Constitutionibus Ordinis par. 3. cap. 2. §. 11.*

Sed quando his non obstantibus reelectio nostri Prouincialis
cassanda quoque fuisset propter Constitutionis obstaculum,
cur quæso dicta cassatio extensa etiam fuit ad cæteras ele-
ctiones Definitorum, & Priorum Conuentuum nullum ha-
bentes vitium, quæ singula de per se Canonice celebratæ
fuerunt, vt ex iisdem actis *litt. T.* & sub tota *litt. BB.* ac à ree-
lectione Prouincialis aliquam non habent dependentiam?

Si enim fortè dicitur, quod Pater Generalis cassauit totum Ca-
pitulum, quia Prouincialis malè electus in omnibus sequen-
tibus electionibus suffragauit tripliciter responderur.

Primò, quod dictus Prouincialis si non tanquam electus saltim,
vt absolutus tam in Capitulo, quam in Definitorio in con-
citis electionibus habebat suffragium sic ordinantibus Con-
stitutionibus 3. parte cap. 7. num. 5. de modo eligendi *Diffinitores*
Summ. num. 4. Ideoque ex illius voto legitimo, & necessario
electiones annullari non poterant.

Secundò, quod singulæ electiones prædictæ celebratæ fuerunt
Vocalibus omnibus consentientibus, vt de Diffinitoribus
constat ex actis *litt. I.* & de Prioribus *litt. BB.* Nam conse-
quenter cum etiam sine voce præfati Prouincialis suum ha-
buissent effectum per maioritatem votorum suffragium illius
etiam vtri extranei, seu inhabilis ad votandum admissi ele-
ctiones ipsas irritare non poterat, cum ad istum effectum re-
quireretur, vt electio ex vi illius voti completa fuisset *Passer-
rin. de elect. cap. 13. num. 41. & cap. 15. num. 24.*

Tertio denique, quia, vt supra insinuatum est nostra reelectio
propter obstaculum Constitutionis non fuit nulla ipso iure,
sed

sed annullanda, & sicut cassari, ita etiam à Superiori confir-
mari potuisset, in tantum, quod neque esset in potestate ele-
ctorum detecta nullitate in publicatione Scrutinij ad aliud
Scrutinium, & nouam electionem procedere, vt inquit *Passer-
in. de elect. cap. 18. num. 40.* Nam ex his sequitur, quod in-
terim in foro fori electio tenuit fuitque in statu implicito va-
liditatis, & potuit electus officium sibi delatum liberè ad-
ministrare, nec debuit ab eiusdem administratione abstinere,
donec in foro externo sententia mediante eius electio nulla
sit declarata ex deductis à *Boss. in Moral. tom. 3. tit. 15. nu. 158.*
Passerin. de elect. cap. 9. num. 33. & 34.

Nec inuat si diceretur, quod dum peccauit totum Capitulum
contra Constitutionem promouendo ad Prouincialatum
inhabilem, & ineligibilem eius acta vt facta à voce priuatis
cassari debeant ex integro.

Quoniam, vel prætenditur istud deduci vigore Constitutionum,
vel Canonum, si vigore Constitutionum assignandus est prius
locus ad hæc vsque tempora nobis incognitus, in quo cassa-
tio huiusmodi, & vocis priuatio, isto casu ordinetur, nam
cum vtraque sit pœna debet à Iure expressè esse imposita.
Barbos. axiome 181. num. 7.

Si autem vigore Canonum supplicatur iduertere, quod licet
multæ sint Decretales, quæ Electoribus malè eligentibus
pœnam priuationis vocis imponunt, nulla tamen earum lo-
quitur in terminis nostris eligentium inabilem, sed eligen-
tium tantum indignum, vt recensitis omnibus eis Decretali-
bus optimè ostendit *Passerin. in sæpè citato tractatu de elect.*
cap. 29. num. 91. & seq. per totum quæsitum 11. qui vltorius
ibi *num. 96.* probat nec dictos Canones locum habere in ele-
ctionibus Regularium, quia loquuntur tantum de Clericis,
quorum nomine in odiosis regulares non veniunt, & *num. 97.*
firmat minùs comprehendere quemcumque indignum, sed
solum eum, qui talis sit vel ex defectu natalium, vel ætatis,
vel scientiæ, vel morum. Itaut si eligatur, qui alium defectum
patiat, eligentes pœnam dd. capitum non incurrunt, vt
rursus etiam insinuat *cap. 31. num. 25. & num. 38.*

Quapropter cum nos versemur in singulis istis limitationibus,
& ex deductis pateat Canones loqui in terminis longè di-
uersis, non possunt trahi ad casum nostrum per regulam ge-
neralem, quod pœnæ restringi debeant non ampliari, & præ-
cisè,

cisè, quod eligentes inhabilem, & ineligibilem non sint priuati electione, nec voce, & poenas supradictorum Canonum non incurrant ex rationibus allegatis concludit *Passerin. in loco citato num. 99. & 101.*

Et hinc descendit tertium grauamen à Patre Reuerendissimo Generali illarum Prouinciæ instituendi scil. auctoritate propria nouum Rectorem Prouincialem, & novos Definidores, quia cum hoc agere non potuerit, nisi Iure deuolutionis, & deuolutio isto casu nec à Constitutionibus ordinis, nec à Sacris Canonibus ei deferatur vtique quando etiam Capitulum annullandum fuisset, non poterat per se ipsum alios electos nominare, & super inducere, sed tenebatur ad eligentes ex integro remittere electionem, vt articulo plenè discusso probat idem *Passerin. de elect. alleg. cap. 31. num. 16. & 22. cum duobus seq.*

Nec obstat si exaduerso opponatur, quod idem sit nulliter eligere, & non eligere, & sic electio, quæ nulla fuit, non sit habenda pro electione, & consequenter tanquam non facta infra terminum præfixum à Constitutionibus sit deuoluta ad Patrem Reuerendissimum Generalem, quia obiectum non currit. Nam cum à Capitulo electio verè, & realitèr facta fuerit intra terminum Iuris, non inde, quod postea electio inualida reperiatur, haberi debet pro non electione, & deuoluitur ad Superiorem cum poena deuolutionis imposita sit contra negligentes in eligendo, non contra eligentes, defectuosè. Ideoque si electio, quæ facta est ex aliquo vitio, seu nullitate cassari contingit, non ideo ad Superiorem deuoluit, sed redit iterum ad eligentes, vt respondendo obiectioni firmat noster *Passerin. de elect. cap. 13. num. 38. & seq. per tot. quæsitum 6. præsertim num. 40. cum duobus seq.*

Ceterum, quod summè dolet, & supplicantur Eminentissimi Domini benignè ponderare est, quod hodie Prouincia per cassationem dicti Capituli, & Institutiones Reuerendissimi Patris Ordinis in vnius solius hominis moderni scilicet Re-
toris Prouincialis potestate miserabiliter est constituta, nam nedum de præsentī tota Prouincia ab eius Imperio dominatur quoniam Definidores, & Priores Conuentuum à sola sua voluntate dependent, sed etiam dominabitur in futurum, dum tam Visitator, quam futuri Capituli Præsidentis sunt in officijs eo procurante instituti, & consequenter futurum quoque

quoque Capitulum, & electiones in eo celebrandæ à solo
nutu eiusdem moderni Prouincialis regulabuntur, quod si
expediat bono Prouinciæ regimini, & libertati electionum à
Sac. Canonibus, & ordinis Constitutionibus ardentè ad eò
concupitæ iudicent Eminentissimi Patres, & si absurdum
inuenerint secundum eorum prudentiam, & innatam Iusti-
tiam prouideant.

Quare &c.

Petrus Antonius Maronius.

Sacre Congreg. Episcoporum, & Regularium.

Eminentissimo, & Reuerendissimo D.

CARD. S. CECILIE

**Quitensis, nullitatis cassationis
Capituli.**

P R O

Provincia Quitensis, & electis in illius
Capitulo Prouinciali,

C O N T R A

Admodum R. P. Magistrum Procurato-
rem Generalem Ordinis S. Augu-
stini, & alios quoscumque.

Facti.

ROMÆ, Typis Reu. Cameræ Apost. 1684.

Superiorum permissu.